

Zaccaria Giacometti (1893–1970)

Giurist grischun per las linguas naziunalas

DA GUIU SOBIELA-CAANITZ

■ **La Bergiaglia, oz mo pli in circul ed ina vischnanca, è ina vallada tut atgna dal Grischun.** «L'onn 803 è ella vegnida integrada en il contadi da Com (...). L'onn 960 ha l'imp[eratur] Otto I regalà la B[ergiaglia] a l'investg da Cuir (...). Il 1367 è la B[ergiaglia] vegnida incorporada en la L[ia da la Chadè] (...). La determinaziun dal tal[jan] sco lingua uffiziala en B[ergiaglia] ha favurissà l'indipendenza politica da la val (...). La fam[iglia] dals artists Giacometti da Stampa ha cuntanschì renum mundial» (1). Fitg impurtant per il dretg public svizzer è dentant in auter commember da lezza schlatta bergiagliotta: Zaccaria Giacometti, autur da «Die Erhaltung der sprachlich-kulturellen Italianità der Südschweiz» (2) e da la nova elavuraziun (Turitg 1949) da «Schweizerisches Bundesstaatsrecht» da Fritz Fleiner (1867–1937). Il giurist Andreas Kley (Universitad da Turitg) ha gist publictà ina biografia da quel Giacometti (3); i suonda ina resumaziun da ses essai.


Defensur dal stadi da dretg

Zaccaria Giacometti, naschì e creschì si en Bergiaglia, ha frequentà il gimnasi d'Aschera da 1907 en fin a 1914. Ses anteriur conscolar basilais Christoph Bernoulli (1897–1981) sa regorda: «El superava ses conscolars areguard l'intellect, la furmazion ed il sentiment artistic. El na badava che l'entir gimnasi al venerava. La magistraglia l'admirava ed al tractava a moda speziala. Perfin ils scolars sminavan differenza e distanza. Nus tuts ans sentivan sco uffants en conglual cun el (...). El ispirava respect cun ses patratg fulminant, spiertus e buntadaivel. Gia lezza giada scriveva'l per la 'NZZ' (...). El derivava d'ina vallada alpina, ma cun ses spiert cosmopolitic intgantava'l bler dapli che nus provincials da Basilea (...). Co pudeva derivar da Stampa, en la lontana Bergiaglia, in giuven uschè viscal, cun interess uschè vast?» (cità p. 41). 1916–1919 ha'l studegià dretg costituzional tar Fleiner a l'Universitad da Turitg. «Barba Giovanni

Giacometti ha purtretà 1916 ses nev Zaccaria (...) sper il Lai da Segl. Il purtret mussa Zaccaria che legia a moda fitg concentrada, (...) absorbà da la lectura (...). Il maletg è ussa dal 'Museo Cïssa Granda' a Stampa» (p. 46). 1919 ha'l doctorà tar lez docent cun ina lavur titulada: «Die Genesis von Cavours Formel 'Libera Chiesa in libero Stato'». Il politicher piemontais Camillo Benso cont Cavour (1810–1861), figl d'ina Genevrina, è stà davent da 1852 primminister dal reginam da Sardegna-Piemunt e da mars 1861 en fin a sia mort en zercladur l'emprim primminister dal nov reginam da l'Italia. Ils 17 da mars ha Cavour appellà davant il parlament ad ina «libera Chiesa in libero Stato», la quala duaja renunziar ad in agen stadi; pir 1929 ha il papa acceptà da sa cuntentar cun il Stadi vatican. Il motto «Ecclesia libera in patria libera» derivava dal catolic liberal Charles Forbes cont da Montalembert (1810–1870), commember da l'«Académie française», ed è vegni derasà dal plevon reformà vadais Alexandre Vinet (1797–1847). En ils onns ventg ha Zaccaria Giacometti scrit sia lavur da habilitaziun davant il Tribunal federal. Da 1927 en fin a sia demissiu 1961 è'l stà professor a l'Universitad da Turitg. «Sia atgnadad era la perseveranza areguard l'idea dal stadi da dretg; el n'acceptava nagina activitad statale che saja nuncuntrollada e lubeschia ina 'libra interpretaziun'. El motivava lezza concezziun cun ils dretgs da libertad e d'adualitad giuridica e cun lur consequenza, numnadamain il cumond d'arbitrariadad (...). Dentant hai cuzzà decennis da realisar quella visiu; lezza ha triumfà areguard las sentenzas pir 2003 cun duas decisiuns dal Tribunal federal davant nateralisaziuns» (p. 52).

«Ina grupp linguistica confederada»

Ins po cumparar la vita e l'ovra da Zaccaria Giacometti cun quella d'in auter perscrutader bergiagliot renumà: Il «dantist» Giovanni Andrea Scartazzini (1837–1901), ordinà plevon reformà 1865 a Berna e puspè 1876 a Cuir, ha vivì bunamain adina en la Svizra alemana; sia da-



Giovanni Giacometti ha purtretà Zaccaria Giacometti.

MAD

vosa plaiv (1884–1901) è stada Fahrwan-gen/AG. «Sunter scolaziun en Bergiaglia (interrotta), ha el fatg la matura a l'Institut da las missiuns evang[elicas] a Basilea e frequentà las univ[ersitads] da Basilea e Berna (...). Sper la pastoraziun è S[cartazzini] sa deditgà intensivamain a l'interpretaziun da l'ovra da Dante Alighieri ed ha publictà numerus tractats davant quella. Ses capodovra resta 'La Divina Commedia [...] riveduta nel testo e commentata' (Lipsia, 1874–82)» (4). Era Zaccaria Giacometti, sper sias perscrutaziuns ed obligaziuns professunalas a Turitg, ha s'engaschà per sia lingua taliana. En l'essai menziunà sura (v. nota 2) ha'l punctuà ch'ins duaja urgentamain prender mesiras effizientas per proteger il linguatg da la Svizra italofo: «Da quai dependa l'existenza d'ina grupp linguistica confederada, pia forsa perfin da la Svizra; i sa tracta insumma da bains bler pli eminentes che singuls dretgs liberals'. L'autur sustegnava era la proposta d'instituir in' universitad italofo-

na en il chantun Tessin. El ha anc sa fatschentà [en lez essai] cun la situaziun ch'el sez aveva vivì en las valladas dal Grischun italofo. Là saja la situaziun anc pli greva, damai ch'i furmian ina minoritad aifer il chantun e n'hajan nagin gimnasi italofo. Ellas sajan plinavant geograficamain isoladas; dalonder lur situaziun economica precara. Il tudestg haja acquistà là in pais memia grev a disfavour dal talian. Giacometti: 'Ils Grischuns italofo che frequentan gimnasis germanofo sajan pli u main pers per la cultura taliana' (cità p. 53). Er en sia elavuraziun nova (1949) dal manual da Fleiner ha Giacometti definì la plurilinguitad «in element naziunal da la Svizra» e punctuà: «L'idea da la naziun politica plurilingua è colliada stretgmain cun il patratg liberal e federalistic dal pajais» (cità p. 54).

In'intervenziun persunala

Il romanist bergiagliot Renato Stampa (1904–1978), docent a la Scola chantunala

grischuna, rapporta d'in'intervenziun da ses parent Zaccaria Giacometti l'onn 1943, cur che lez era gia professor d'universitad e ch'ins renonuscheva generalmain sia autoritad: «Jau hai survegnì da Brüschi ina brev che sa lamentava davant il rectorat da la Scola chantunala: Lez duvrava il tudestg per trametter rapports als geniturs davant las prestaziuns dals figls. La brev ma supplitgava d'intervegnir tar il rectorat, perquai ch'insaquants geniturs na chapeschian betg tudestg e ch'ins na mussia betg gugent tschertas brevs a terzas persunas. Lur hai scrit a Zaccaria Giacometti per enconuscher sia opiniun en chaussa; lez è s'enlegia stà positiv. Sin quai suna i tar rectur J. M. [sic!] e l'hai declerà ses gjavisch. Il rectur ha sa chapescha pruvà da cumprovar ch'ins na possa far quai, ch'i muntass memia blera lavur e costs surfatgs per il chantun euv. Lura l'hai purschì la brev da Giacometti, schend cun maniera che la lescha saja lescha e ch'ins duaja far per cumond, era sche quai pudess chaschunar dischavantatgs» (cità p. 54). Stampa citescha lezza brev dals 14 da december 1943: «Il chantun, pia las autoritads chantunalas en funcziun uffiziala, duain sa drizzar a persunas singulas en la lingua [uffiziala] da lezzas; il rectorat da la Scola chantunala, cun infurmar glied dal Grischun italofo, duai pia duvrar il talian. Uschia la situaziun legala tenor art. 46 da nossa constituziun chantunala: Lez garantescha a mintga uman ch'el astgia duvrar in dals trais linguatgs dal chantun» (cità p. 54). La prioritad dal stadi da dretg deva pia raschun als geniturs d'ina vischnanca rurale periferica enconter il rectur dal gimnasi chantunala.

1. Martin Bundi en: *Stiftung Historisches Lexikon der Schweiz (HLS), tom 1. Cuir (Desertina), ISBN 978-3-85637-390-0* 2010, pp. 83–84, chavazzin «Bergiaglia».
2. En: «*Neue Schweizerische Rundschau*» 5/1935, pp. 257–266.
3. Andreas Kley, Bregaglia – Zurigo: *Luoghi di vita e di attività del docente di diritto costituzionale Zaccaria Giacometti*, en: «*Quaderni grigionitaliani*» 1-2013, pp. 37–64.
4. Remo Fasani en: *Stiftung Historisches Lexikon der Schweiz (HLS), tom 2. Cuir (Desertina), ISBN 978-3-85637-391-7* 2012, p. 316, chavazzin «Scartazzini, Giovanni Andrea».